

# 1 YONI

Yoni'a Kalisitini vaya'mo alino lokiya vaino apatesige'a Goti'e mafa'ne'amo Yesu Kalaisi'e'mo afalu afalugana hu'a lokae'a maisayafe'mo avo'mo kaege aigofe gemo'a alino hosu huno o'apatesiyafe'mo avo'mo kaege huno kae'niye. Yoni'a, aigofe vaya'mogi Yesufe'mo Kalaisi ne'mo o'mai'niye, hu'a hute'a humi lapategefe'mo nehae, huno huteno'ae'mo, Goti'a lapakaefe'mo hau ayamopafi'mo hau'niya vekamo mai'niye. Gotife'mo lapau lapayamopafi'mo lapau'nisigetapae'mo konagatapimogi'efe'mo lapau lapayamopafi'mo lapaino, huno mani avo'mo kae'niye.

*Maige maige huta maisuna ya'mo aepa vekae'mo ava gemo hu'niya gema*

<sup>1</sup> Lagaemo mago vekamo agi'amo Goti Ge'amo maige maige hu'a ne'maiya ya'mo aepa vekae'mo ava gemo huta mani avo'mo nekaone. Ani vekamo ali'ya'amo aepa fai'niya afinateti'mo maima maima eno mai'nigetae'mo ge'amo afiteta laulagafati'mo age'none. He, aulu haeta ageteta agufale'mo layateti'mo ame ali'none.

<sup>2</sup> Mani vekamo afa'a ne'maiya ya'mo aepa vekamo afole ai'nigeta agetetae'mo agaefe'mo faigoko ge'amo aeta hakalo huta lapa nepaune. Agaemo maige maige hu'a ne'maiya ya'mo aepa vekamo'a Goti muki ya'mo Afo'amo'e'mo

magokepi lokaeno mai'nenno lagaetegamo afole ai'niya vekaeke'mo ava gemo lapa nepaune.

<sup>3</sup> Lagaemo afiteta age'nona kavafe'mo ava gemo hutae'mo lapakaemo lagae'e'mo afalu afalugana huta maisunafe'mo aeta hakalo huta lapa nepaune. Lagaemo Afotimo'e mafa'ne'amo Yesu Kalaisi'e'mo afalu afalugana huta ne'maune.

<sup>4</sup> Lagaemo lapaipafi'mo lapamogaga aisaya kava'mo havai tesiyafe'mo mani avo'mo nekaone.

<sup>5</sup> Goti Mafa'ne'amo'mo ina ge huno laha pai'nigeta afitetae'mo aeta hakalo huta lapa nepaune. Lapa paitae'mo Goti'a ha le ya'a'e vekamo mai'nigeno aipafi'mo hani ya'amo alagi ohane'niye, huta lapa nepaune.

<sup>6</sup> Lagaemo hanipi'mo umenitata nehutae'mo, Goti'e'mo afalu afalugana huta lokaeta ne'maune, huta nehisanana aigofe gemo huteta lama gemo alagi akame nosune.

<sup>7</sup> Lagaemo hanipi'mo umenitata osuta Goti'a aeno ha neleya yate'mo ne'maiya kava huta aeno ha neleya yategamo umenitata nehisanana agae'e'mo afalu afalugana huta mai'nonageno'ae'mo agaemo lagae'e'mo ani kava huno afalu afalugana huno ne'maigeno Mafa'ne'amo Yesu Kalaisi kola'amo'a muki hosu kavatimo aeno kalo paeno ne'atale.

<sup>8</sup> Lagaemo, hosu kavatimo ohane'niye, huta nehisanana lagaitie'mo humi nelatonageno'ae'mo lama gemo laipafi'mo alagi nohane.

<sup>9</sup> Lagaemo Gotife'mo, magufa hosu kava hu'nove, inagufa hosu kava hu'nove, huta

aeta hakalo huta ha paisunageno'ae'mo alagi alino ataleteno, afa'a ateyo, nehuno'ae'mo muki hosu kavatimo aeno kalo paeno atalesiyafe'mo agaemo huguve, huno hu male'niya ge'amo alagi akame huno fatago kava'amo hugiye.

<sup>10</sup> Lagaemo, hosu kava'mo osu'none, huta nehisanana ina ge huta Gotife'mo hutae'mo, aigofe gemo nehia veka, huta nehunageno'ae'mo lama gemo laipafi'mo alagi nohane.

## 2

<sup>1</sup> Aise mafa'ne'nimogitapae, lapakaemo hosu kava'mo osisayafe'mo mani gemo lapakaefe'mo avo'mo nekaove. Mago vekamo'mo hosu kava'mo hisiyana laha maeno muki ya'mo Afo'amofe'mo ge huno nelateya vekamo mai'niye. Ani vekamo Yesu Kalaisi'a fatago vekamo mai'niye.

<sup>2</sup> Agai'amo Goti'a aipamo'mo falu huno latesiyafe'mo mai'niye. Goti'a lagaefeke'mo aipamo'mo falu huno latesiyafe'mo o'mai'nifa muki ma mopafi'mo mai'naya vaya'efe'mo Goti'a aipamo'mo falu huno apatesiyafe'mo mai'niye.

<sup>3</sup> Goti'a, mani kava hiyo, ina kava osiyo, huno hu'niya ge'amo akame nehisanana ani kavateti'mo ago age'nonana Goti'a ageta aeto hu'none.

<sup>4</sup> Mago vekamo'a, age'na aeto hu'nove, nehuno'ae'mo Goti ke'aepa ge'amo akame no-sisiyana agaemo aigofe vekamo mai'nigeno lama gemo aipafi'mo alagi nohane.

<sup>5</sup> Nohane'niya'monanafa muki vaya'mogi Goti ge'amo akame nehisaya vaya'mogimo

Gotife!mo hapau apayamopafi!mo nehapaiya kava!apimo!mo haino hapai'niye. Ani kavateti!mo ago age'nonana agaepi!mo mai'none.

<sup>6</sup> Agaepi!mo alagi mai'none, hu'a nehisaya vaya'mogimo Yesu'a hu'niya agufa kava'mo akame hu'a hisaya kava'mo hane'niye.

*Saufa ke'aepa gee'mo ava gemo hu'niya gemae*

<sup>7</sup> Nagana'nimogitapae, nagaemo saufa ke'aepa gemo lapakaefe!mo avo'mo nokaofa atafa ke'aepa gemo akeya'vilaga aepa faitapa afi'naya afinateti!mo ali'naya gemo lapakaefe!mo avo'mo nekaove. Lapakaemo mani atafa ke'aepa gemo'a aepa fai'naya afinateti!mo afime afime etapa afita mai'nae.

<sup>8</sup> Afitapa mai'naya'monanafa hemenimo saufa ke'aepa gemo lapakaefe!mo avo'mo nekaove. Mani ke'aepa gemo'a agaepi!mo hane'nigeno'ae'mo lapakaepi'e!mo hane'niye. Hani hu'niya kava'mo hano hugefe!mo nehigeno'ae'mo ha le ya'mo'a aeno ha neleya'mofe'mae.

<sup>9</sup> Mago vekamo'a, ha le yategamo ne'mauve, huno huteno konaga'ae'mo hau ayamopafi!mo ohau'nisigeno aini huno ne'atesiyana hanipi!mo maim maim ne'e.

<sup>10</sup> Konaga'ae'mo hau ayamopafi!mo nehaiya vekamo'a ha le yategamo alagi mai'nigeno'ae'mo aipafi!mo alino ago'ya faino atalesiya agufa kava'mo alagi nohane.

<sup>11</sup> Nohane'niya'monanafa konaga'ae'mo hau ayamopafi!mo ohau'nigeno aini huno ne'atesiya

vekamo'a hanipi'mo mai'nenno hanipi'mo umenitata nehuno'ae'mo, haiya kate'mo ne'ufi, huno no'age. Hani ya'mo'a aulagafi'mo aino ati kae'niya'mofe'mo ka'mo no'age.

*Ma mopafi yafe'mo olapaino, huno hu'niya gemae*

<sup>12</sup> Aise mafa'ne'nimogitapae, Goti'a Kalaisi agi'aleti'mo hosu kavatapimo ago alino atale'niya'mofe'mo lapakaefe'mo mani avo'mo nekaove.

<sup>13</sup> Vayatama vaya'mogitapae, lapakaemo aepa fai'niya afinateti'mo mai'niya vekamo ago age'naya'mofe'mo lapakaefe'mo mani avo'mo nekaove. Neya vaya'mogitapae, lapakaemo hosu vekamo aetapa agase'naya'mofe'mo lapakaefe'mo mani avo'mo nekaove. Saufa mafa'ne'nimogitapae, lapakaemo muki ya'mo Afo'amo'mo ago agetapa aeto hu'naya'mofe'mo lapakaefe'mo avo'mo nekaove.

<sup>14</sup> Vayatama vaya'mogitapae, lapakaemo akeya'vilaga aepa fai'niya afinateti'mo mai'niya vekamo ago age'naya'mofe'mo lapakaefe'mo mani avo'mo kae'nove. Neya vaya'mogitapae, Lokiya vaitapa mai'nageno'ae'mo Goti ge'amo lapaipafi'mo alagi hane'nigetapae'mo hosu vekamo aetapa agase'naya'mofe'mo lapakaefe'mo mani avo'mo kae'nove.

<sup>15</sup> Lapakaemo ma mopafi kavafe'mofi ma mopafi yafe'mofi huno olapaino. Ma mopafi kavafe'mo nehapaiya vaya'mogimo Afotimo Gotife'mo hapau apayamopafi'mo nohapaiye.

16 Muki ma mopafi kava'mo hane'niyana apakufamo'mo ha'ye nehiya kava'mo hanege ne'age'apae'mo hapa'ye nehiya kava'mo hanege alite'a ala apaki ne'aliya kava'mo hanege huno hane'niye. Ani kava'mo'a Goti kava'amo ohane'nifa ma mopafi kava'mo hane'niye.

17 Ma mopafi kava'e ma mopafi kavafe'mo hapa'ye nehiya kava'e'mo ago hano hugefe'mo nehianageno alagi hano hugiya'monanafa Goti ge'amo akame nehaya vaya'mo maige maige hu'a maigae.

18 Saufa mafa'ne'nimogitapae, ma mopamo hano husiya afina'mo ago hogo nehiye. Lagaemo, Kalaisi kame'amo afole aigiye, huta ago lapa pai'nonagetapa afi'nae. Inagi hemenimo asole kame vaya'amo afole ai'naya'mofe'mo hano husiya afina'mo ago hogo nehiye, huta afi'none.

*Kalaisi kame vaya'amo afole ai'naya gemae*

19 Apakaemo ago latale'a u'naya'monanafa vayatimo o'mai'nae. Apakaemo lagaepati'mo mai'naesinana olatale'a lagae'e'mo magokepi lokae'a mai'naesine. Ani vayapati'mo mago vekamo vayatimo o'mai'niye, huta apakesunafe'mo ago latale'a u'nae.

20 Apakaemo atale'a u'naya'monanafa lapakaete aote vekamo Kalaisi'a uvelimo lakino faleno lapategekana huno Goti Auneme'amo alino lapami'nigetapa muki ge'amo afi'nae.

21 Inagi lapakaemo lama gemo o'afi'naya'mofe'mo mani avo'mo okae'nofa lapakaemo lama gemo ago afitetapae'mo aigofe gemo'mo lama gefati'mo afole no'aiye,

hutapa ago afi'naya'mofe'mo lapakaefe'mo mani avo'mo kae'nove.

<sup>22</sup> Aigofe vaya'mo ina lagimae. Yesufe'mo Kalaisi ne'mo o'mai'niye, hu'a ae'a hakalo hu'a hapa nepaiya vaya'mo aigofe vaya'mo mai'nae. Apakaemo, Yesu'a Kalaisi ne'mo o'mai'niye, hu'a huge Goti'mo Yesu afo'amo'mo o'mai'niye, hu'a huge hu'a ae'a hakalo hu'a hapa nepaiya vaya'mo Kalaisi kame vaya'amo mai'nae.

<sup>23</sup> Muki vaya'amogi, Yesu'a Kalaisi ne'mo o'mai'niye, hu'a ae'a hakalo hu'a hapa nepaiya vaya'ai apaipafi'mo muki ya'mo Afo'amo'mo avale'a o'ate'nae. Muki vaya'amogimo, Yesu'a Kalaisi ne'mo mai'niye, hu'a ae'a hakalo hu'a hapa nepaiya vaya'ai apaipafi'mo muki ya'mo Afo'amo'e Mafa'ne'a'e'mo anavale'a anate'nage'ana ne'mai'ae.

<sup>24</sup> Ani gemo hane'niya'mofe'mo lapakaemo hogotetapa aepa faitapa afi'naya afinateti'mo afi'naya gemo lapaipafi'mo alagi hanesiyafe'mo atafauta alagi hiyo. Aepa faitapa afi'naya afinateti'mo afi'naya gemo'a lapaipafi'mo alagi hane'nisiyana Mafa'ne'afi'e Afo'amopi'e'mo alagi maigae.

<sup>25</sup> Kalaisi'a lapa maegauve, huno hu male'niya polomasi gemo'a huno'ae'mo, maige maige hutapa maisaya ya'mo ali'na lapamiguve, huno laha pai'niye.

<sup>26</sup> Nagaemo humi lapategefe'mo nehaya vaya'ai apava gemo hu'na lapakaefe'mo ago avo'mo kae'nove.

<sup>27</sup> Humi lapategefe'mo nehaya'monanafa Kalaisi'a uvelimo lakino faleno lapategekana

huno Goti Aote Auneme'amo alino lapami'nigeno alagi maisiyafe'mo lapaipafi'mo alagi mai'niya'mofe'mo mago vaya'mogi ali'a lapaya malesaya agufa gemo ohane'niye. Goti Auneme'amo'mo muki ge'amo ago alino lapaya male'niya'mofe'mae. Ani gemo mago aigofe gemo ohane'nifa alagi lama gemo hane'niye. Agaemo, Kalaisipi'mo alagi maiyo, huno huteno alino lapaya male'niyanagetapa Kalaisipi'mo alagi maigae.

<sup>28</sup> Aise mafa'ne'nimogitapae, Eminesigetae'mo lokiya vaita mai'neta uta fala okita aulagale'mo lavagage osisiyafe'mo hemenimo agaepi'mo alagi maigetao.

<sup>29</sup> Lapakaemo Goti'a alagepa kava'ageke'mo nehia vekae, hutapa ago afi'naya'mofe'mo agaemo alagepa kava'mo nehaya vaya'mo hogoteno alino apate'nige'a mafa'ne'amo mai'nae, hutapa ago afi'nae.

### 3

*Goti mafa'ne'aife'mo apava gemo hu'niya gemae*

<sup>1</sup> Afiyo, Afotimo'a lagaefe'mo aeto agufa kava huno hau ayamopafi'mo hau'nigeno'ae'mo, Mafa'ne'nimogitapae, huno nehigetae'mo lahau ne'aune. Ma mopafi vaya'mogimo Goti'mo o'age'naya'mofe'mo lagae'e'mo lage'a aeto nosae.

<sup>2</sup> Nahau'niya vaya'mogitapae, hemenimo Goti mafa'ne'amo mai'nonanageta henaga'amo haiya agufa vaya'mo maisupi, huta o'afi'nona'monanafa agaemo emineno afole



ne'aisigetae'mo agaekana huta maigune, huta afi'none. Haiya agufa vekamo mai'nifi, huta ageta aeto huguna'mofe'mo agaekana huta maigune.

<sup>3</sup> Muki vaya'amogimo, ani kava'mo afole aigiye, hu'a hute'a agava mai'ne'a apamogaga ne'aiya vaya'mo apaikai'apimo sese hu'a ne'apatae. Agaemo yaveyave'age aipa'e vekamo mai'niyanage'a agaekana hu'a maisayafe'mae.

<sup>4</sup> Hosu kava'mo nehaya vaya'mogimo Goti ke'aepa ge'amo ago amagi'a ne'atalae. Hosu kava'mo Goti ke'aepa ge'amo amagi'a ne'atalaya kava'mo hane'niye.

<sup>5</sup> Lapakaemo ago afi'nayana Kalaisi'a hosu kavatimo alino atalesiyafe'mo emineno afole ai'niye. Agai'a aipafi'mo hosu kava'amo alagi ohane'niye.

<sup>6</sup> Muki vaya'mogi agaepi'mo alagi mai'nisaya vaya'mogimo hosu kava'mo nosae. Hosu kava'mo nehaya vaya'mogimo Kalaisi'a o'agege age'a aeto osuge hu'nae.

<sup>7</sup> Aise mafa'ne'nimogitapae, fiku yanagetapa apate'nisage'a humi lapategayanagi. Kalaisi'a fatago vekamo mai'niya kava hu'a alagepa kava'mo nehaya vaya'mo fatago vaya'mo mai'nae.

<sup>8</sup> Satani'a aepa fai'niya afinateti'mo hosu kavake'mo hume hume ne'eya kava hu'a muki vaya'mogi hosu kava'mo nehaya vaya'mo Satani vaya'amo mai'nae. Goti Mafa'ne'amo'mo Satani ali'ya'amo alagi alino hano huno atalesiyafe'mo emineno afole ai'niye.

9 Ina lagimo Goti'a alino apate'nifi Goti avina ya'amo apaipafi'mo hane'niya'mofe'mo hosu kava'mo akame nosae. Goti'a alino apate'niya'mofe'mo apakaemo hosu kava'mo alagi akame osugae.

10 Muki vaya'mogi fatago kava'mo nosaya vaya'mo Goti mafa'ne'amo o'mai'nae. Konaga'apie'mo nohapaiya vaya'mogimo ani kava hu'a Goti mafa'ne'amo o'mai'nae. Ani kavateti'mo Goti mafa'nemo mai'nafi Satani mafa'nemo mai'nafi hu'a apakesaya kava'mo hane'niye.

*Konagatapie'mo lapaino, huno hu'niya gemae*

11 Lapakaemo aepa fai'naya afinateti'mo, konagatapie'mo lapau lapayamopafi'mo lapaino, huta lapa pai'nonagetapa afi'nae.

12 Kenikana huta o'maisuna kava'mo hane'niye. Keni'a hosu vekamo mafa'ne'amo mai'nenno agana'amo'mo amagi'nigeno fali'niye. Na kava higeno kamiti amagi'niye. Keni'a hosu kava'mo hu'nigeno agana'amo'mo fatago kava'mo hu'niya'mofe'mo kamiti amagi'nigeno fali'niye.

13 Konaga'nimogitapae, ma mopafi vaya'mogimo apaini hu'a lapatesagetapae'mo lapau o'aiyo.

14 Lagaemo konagatie'mo lahou layamopafi'mo nelahaiya'mofe'mo ago afi'nonana nefaliya kavategati'mo ago ataleta eta afa'a ne'maiya kavategamo ne'maune. Konaga'apie'mo hapau apayamopafi'mo nohapaiya vaya'mo nefaliya kavategamo alagi ne'maiye.

15 Konaga'amofe'mo aini huno ne'ateya vekamo'a konaga'amo'mo kamiti ne'amagiya vekagana huno mai'niye. Lapakaemo ago afi'nayana kamiti ne'apamagiya vaya'ai apaipafi'mo maige maige hu'a ne'maiya ya'mo alagi nohane.

16 Yesu'a afa'a ne'maiya ya'amo lagaetefe'mo atale'niya'mofe'mo lagaefe'mo hau ayamopafi'mo hau'niya kava'amo age'nonanageta ani kava huta konagatimog-itefe'mo afa'a ne'mauna yatimo atalesuna kava'mo hane'niye.

17 Hane'niya'monanafa mago vekamo'a hapa maesiya ya'amo hane'niya vekamo'a agesiyana mago konaga'amo'mo kafu huteno mai'nisigeno ageteno'ae'mo hau huno ateteno o'ami'nisiyana Goti'a hau ayamopafi'mo hau'niya agufa kava'amo aipafi'mo hane'nifiye.

18 Aise mafa'ne'nimogitapae, lavaya'aletike'mo ge'ageke'mo hutae'mo, lahau layamopafi'mo nelahaiye, huta osuta alagi lama ge huno lahau layamopafi'mo lahau'ninageta alagepa kava'mo higetao.

*Goti aulagale'mo koli nosaya vaya'aife'mo apava gemo hu'niya gemae*

19 Ani kavateti'mo ago age'nonana lama ge vaya'amo mai'nona'mofe'mo laipamo'mo falu hu'nisigeta Goti aulagale'mo atete osugune.

20 Yu'ilaga mafa'netimo'a, hosu kava'mo nehae, huno nehisigeno'ae'mo Goti'a yu'ilaga mafa'netimo ago aeno agaseno muki kavatimo age'niye.

<sup>21</sup> Nahau'niya vaya'nimogitapae, Yu'ilaga mafa'netimo'a hosu kava'mo nehae, huno nosisiyana lagaemo Goti'a laha maegaiye, huta ago afi'none.

<sup>22</sup> Lagaemo ke'aepa ge'amo akame nehunageno'ae'mo amuse huno nelateya agufa kava'mo nehuna'mofe'mo aukaya nehunageno'ae'mo alino nelamiye.

<sup>23</sup> Goti ke'aepa ge'amo'mo huno'ae'mo, mafa'ne'nimo Yesu Kalaisi agi'alefe'mo lapakesa afita fatago nehutapae'mo konagatapimogife'mo lapaino, huno laha pai'niye.

<sup>24</sup> Muki vaya'mo ke'aepa ge'amo akame nehaya vaya'mo Gotipi'mo alagi mai'nageno apakaepi'mo alagi ne'maiye. Ani kavateti'mo ago age'nonana Goti'a alino lami'niya Auneme'aleti'mo lagaepi'mo alagi ne'maiye.

## 4

*Goti Auneme'a'e hosu apaune'apame'efe'mo apava gemo hu'niya gemae*

<sup>1</sup> Nahau'niya vaya'nimogitapae, Asole aigofe vaya'mogi gemo ae'a hakalo hu'a hapa nepaiya vaya'mo muki ma mopafi'mo umenitata nehae. Umenitata nehayanagi lama gemo nehae, hutapa o'afitapa alagepa huta alita fako hutapa afiteta-pae'mo, Gotitegati'mo e'nafi o'me'nafi, hutapa afiyo.

<sup>2</sup> Muki vaya'mogimo, Yesu'a Kalaisi vekamo mai'nenno ma mopafi vaya'ai apakufagana ag-ufamo aliteno vemo hamale'niye, hu'a nehaya vaya'mo Goti Auneme'amo ali'nae. Lapakaemo

ani kavateti'mo age'nayana Goti Auneme'amo apaipafi'mo mai'niye, huta agetapa aeto hu'nae.

<sup>3</sup> Muki vaya'mogimo, Yesu'a Kalaisi vekamo mai'nenno ma mopafi vaya'ai apakufagana agufamo aliteno vemo hamale'niye, hu'a nosaya vaya'mo Goti Auneme'amo o'ali'nae. Apakaemo Yesu kame'amo auneme'amo ali'nae. Lapakaemo, hogotetapa ani auneme'amo egaiye, hutapa afi'nageno'ae'mo ago e'niye.

<sup>4</sup> Aise mafa'ne'nimogitapae, lapakaemo Goti mafa'ne'amo mai'netapae'mo aigofe vaya'aina ago aeta apakase'nae. Lapaipafi'mo mai'niya Auneme'amo'a ma mopafi vaya'ai apaipafi'mo mai'niya auneme'amo ago aeno agaseno mai'niya'mofe'mae.

<sup>5</sup> Apakaemo ma mopafi vaya'mo mai'naya'mofe'mo ma mopafi kavafeke'mo ava gemo hu'a hapa nepaige'apae'mo ma mopafi vaya'mogi ne'afiye.

<sup>6</sup> Lagaemo Goti vaya'amo mai'none. Goti'a age'a aeto hu'naya vaya'mogimo getimo ne'afiye. Goti vaya'amo o'mai'naya vaya'mogimo getimo no'afiye. Ani kavatefe'mo lama ge aepa Auneme'amo agege aigofe gemo aepa auneme'amo agege huta agegaune.

*Goti'a hau ayamopafi'mo hau'niya vekae'mo ava gemo hu'niya gemae*

<sup>7</sup> Nahau'niya vaya'mogitapae, Hapau apayamopafi'mo nehapaiya kava'mo aepa vekamo Goti'a mai'niya'mofe'mo konagatimogife'mo lahau layamopafi'mo lahaino. Muki vaya'mo hapau apayamopafi'mo

nehapaiya vaya'mo Goti'a alino apate'nige'a mafa'ne'amo mai'ne'a Goti'a ago age'a aeto hu'nae.

<sup>8</sup> Goti'a hau ayamopafi'mo nehaiya vekamo mai'niya'mofe'mo hapau apayamopafi'mo nohapausiya vaya'mogimo Goti'a age'a aeto osu'nae.

<sup>9</sup> Goti'a Yesuteti'mo afa'a maisuna ya'mo alisunafe'mo aiya magoke mafa'ne'amo alino ate'nigeno ma mopafi'mo emine'niye. Goti'a ani kavateti'mo lagaefe'mo hau ayamopafi'mo hau'niya kava'amo alino lave li'niye.

<sup>10</sup> Ala alagepa kava'mo'a hane'niyana lagaemo Gotife'mo lahou layamopafi'mo olahau'niya'monanafa Goti'a lagaefe'mo hau ayamopafi'mo hau'niye. Agaemo lagaefe'mo hau ayamopafi'mo hau'nisigeno aipamo'mo falu huno latesiyafe'mo Mafa'ne'amo alino ate'nigeno emineno hosu kavatilefe'mo falino miya faino late'niye.

<sup>11</sup> Nahau'niya vaya'mogitapae, Goti'a lagaefe'mo hau ayamopafi'mo hau'niya'mofe'mo konagatimogife'mo lahou layamopafi'mo lahaino.

<sup>12</sup> Mago vekamo'a Goti'mo mago afina'mo o'age'niye. Lagaemo konagatimogife'mo lahou layamopafi'mo nelahaisiyana Goti'a lagaepi'mo alagi mai'nigeno hau ayamopafi'mo hau'niya kava'amo laipafi'mo kosino afu le'niye.

<sup>13</sup> Goti Auneme'amo ago alino lami'niya'mofe'mo ani kavateti'mo ago age'nonana agaepi'mo alagi mai'nonageno lagaepi'mo alagi mai'niye.

<sup>14</sup> Lagaemo Afotimo'mo Mafa'ne'amo'mo muki

ma mopafi vaya'ai apakufamo alino katino apatesiyafe'mo alino ate'nigeno emine'niye, huta agetetae'mo aeta hakalo huta hapa nepaune.

15 Goti'a muki vaya'mogi, Yesu'a Goti mafa'ne'amo mai'niye, hu'a ae'a hakalo hu'a hapa nepaiya vayapi'mo alagi mai'nige'a apakaemo agaepi'mo alagi mai'nae.

16 Goti'a lagaefe'mo hau ayamopafi'mo hau'niye, huta afitetae'mo ani kavafe'mo lagesa afita fatago nehune. Goti'a hau ayamopafi'mo nehaiya vekamo mai'niye. Hau ayamopafi'mo hau'niya kavapi'mo alagi mai'nisaya vaya'mo Gotipi'mo alagi ne'maigeno Goti'a apakaepi'mo alagi ne'maiye.

17 Goti'a agoti huno apatesiya afina'mo lagaemo koli osisunafe'mo Goti'a lagaefe'mo hau ayamopafi'mo hau'niya kava'amo'mo laipafi'mo kosino ago afu le'niye. Hemenimo Kalaisi'a mai'niya kava huta ma mopafi'mo mai'nona'mofe'mo agoti huno apatesiya afinafe'mo koli osugune.

18 Goti'a lagaefe'mo hau ayamopafi'mo hau'niye, huta huteta agaefe'mo lahau layamopafi'mo lahau'nisiyana koli nosune. Haino hapai'niya hau ayamopafi'mo hau'niya kava'aleti'mo koli nehuna kavatimo laipafati'mo alino ne'atale. Koli nehaya kava'mo aepa'amo hane'niyana hosu kava'mo nehuna'mofe'mo hosu miyatimo aligune, hu'a apakesamo ne'afiye. Goti'a hau ayamopafi'mo hau'niya kava'amo'mo koli nehaya vaya'ai apaipafi'mo kosino afu nole.

19 Goti'a hogoteno lagaefe'mo hau

ayamopafi'mo hau'niya'mofe'mo lagaemo Gotife'mo lahau layamopafi'mo nelahaiye.

<sup>20</sup> Mago vekamo'a, Nagaemo Gotife'mo nahau nayamopafi'mo ne'nahaiye, huno nehuno'ae'mo konaga'amogife'mo alagi nohaisiyana aigofe vekamo mai'niye. Agaemo age'niya konaga'amofe'mo nohaisiyana haiya kava huno o'age'niya Gotife'mo hau ayamopafi'mo haugiye.

<sup>21</sup> Goti'a mani ke'aepa ge'ae'mo, Lapakaemo Gotife'mo lapau lapayamopafi'mo nelapaisigeno konagatapimogi'efe'mo lapau lapayamopafi'mo lapaino, huno laha pai'niye.

## 5

*Lagaemo ma mopafi kava'mo ago aeta agase'none, huno hu'niya gemae*

<sup>1</sup> Ina lagimo, Yesu'a Kalaisi ne'mo mai'niye, hu'a hute'a apakesa afi'a fatago nehafi Goti'a alino apate'nige'a mafa'ne'amo mai'nae. Muki vaya'amogimo alino apate'niya vekae'mo hapau apayamopafi'mo nehapaisiyana ani kava huno alino apate'niya mafa'ne'amogi'efe'mo hapau apayamopafi'mo nehapaiye.

<sup>2</sup> Lagaemo Gotife'mo lahau layamopafi'mo nelahaisigeta Goti ke'aepa ge'amo akame nehisonana ani kavateti'mo alagi age'nonana Goti mafa'ne'amogife'mo lahau layamopafi'mo nelahaiye.

<sup>3</sup> Gotife'mo hapau apayamopafi'mo nehapaiya kava'mo'a Goti ke'aepa ge'amo ma kava hiyo, ina kava osiyo, huno hu'niya ge'amo akame



nehaya kava'mo hane'niye. Goti ke'ae'pa ge'amo akame hisuna kava'mo'a kana osu'niyanageta afa'a akame hisuna kava'mo hane'niye.

<sup>4</sup> Goti'a alino apate'niya mafa'ne'amogimo ma mopafi kava'mo ae'a ne'agasae. Lagaemo Goti Mafa'ne'ae'mo lagesa afita fatago hu'nona kavateti'mo ma mopafi kava'mo ago aeta agase'none.

<sup>5</sup> Ina lagimo ma mopafi kava'mo ae'a agasegae. Yesu'a Goti Mafa'ne'amo mai'niye, hu'a apakesa afi'a fatago nehaya vaya'amogige'mo afa'a ae'a agasegae.

*Yesu Kalaisife'mo faigoko ge'ae'mo ava gemo hu'niya gema*

<sup>6</sup> Yesu Kalaisi'a aniteti'e kola'aleti'e'mo emine'niye. Agaemo ani'alefeke'mo emi'no'me'nifa kola'ale'efe'mo emine'niye. Goti Auneme'amo'mo lama ge'age'mo nehaya vekamo mai'niya'mofe'mo ageteno ha maeno Kalaisife'mo faigoko ge'amo nehaye.

<sup>7</sup> Lole'e mago'e vaya'mo koku'napi'mo mai'ne'apae'mo agete'a ha mae'a faigoko ge'apimo nehae. Apakaemo Afotimo'agi Goti Ge'amae hu'a agi ne'aya vekagi Aote Auneme'agi hu'a mai'naya'monanafa magoke Goti'a mai'niye.

<sup>8</sup> Lole'e mago'e ya'mogimo ma mopafi'mo hane'ne'a agete'a ha mae'a faigoko ge'amo nehae. Auneme'amo'mogi ani'mo'agi kola'amo'agi hu'a magoke agufa ge'age'mo hu'a agete'a ha mae'a faigoko ge'amo nehae.

9 Ma mopafi vaya'mogimo agete'a ha mae'a faigoko gemo ae'a hakalo nehageta afitetae'mo, alagi lama gemo nehae, huta nehuna'monanafa Goti'a ageteno ha maeno faigoko gemo aeno hakalo nehiya gemo'a ma mopafi vaya'ai ge'apimo alagi ago aeno ne'agase. Goti'a Mafa'ne'amo ageteno ha maeno faigoko gemo aeno hakalo hu'niye.

10 Mani ageteno ha maeno faigoko ge'amo Goti Mafa'ne'ae'mo apakesa afi'a fatago nehaya vaya'ai apaipafi'mo hane'niya'monanafa Goti'a lama gemo nehiye, hu'a nosaya vaya'mogimo Goti'a aigofe gemo nehiya vekamo mai'niye, hu'a nehae. Apakaemo Goti'a Mafa'ne'amo ageteno ha maeno faigoko gemo aeno hakalo hu'niya ge'ae'mo apakesa afi'a fatago osu'naya'mofe'mae.

11 Goti'a ageteno ha maeno faigoko gemo aeno hakalo huno'ae'mo, nagaemo maige maige hutapa ne'maiya ya'mo ali'na lapami'nove, huno laha pai'niye. Ani maige maige hu'a ne'maiya ya'mo mafa'ne'afi'mo mai'niye.

12 Goti Mafa'ne'amo avale'a apaipafi'mo ate'naya vaya'mo maige maige hu'a ne'maiya ya'mo ago ali'nae. Goti Mafa'ne'amo avale'a apaipafi'mo o'ate'nisaya vaya'mo maige maige hu'a ne'maiya ya'mo o'ali'nae.

13 Nagaemo mani gemo Goti Mafa'ne'amo agi'alefe'mo lapakesa afita fatago nehaya vaya'mogita hutapae'mo, maige maige huta maisuna ya'mo ali'none, hutapa afitetapa agesayafe'mo mani avo'mo kae'nove.

Lapakaemo afitetapa lapakesa afitafatago hume hume visayafe'mo avo'mo kae'nove.

*Afa'a maisuna ya'mo ago ali'nonanageta maige maige huta maigune, huno hu'niya gemae*

<sup>14</sup> Lagaemo Goti'a, ani kava'mo huguve, huno hu male'niya kavatefe'mo nunumu huta afi gesunageno'ae'mo getimo afa'a afiteno hugiye, huta agaefe'mo lagesa afitafatago nehune.

<sup>15</sup> Getimo ne'afiye, huta afi'nisunana ago age'nonana na agufa yafe'mo aukaya huta ge nehisiye ago alino lami'nigeta ali'none, huta lagesamo ne'afune.

<sup>16</sup> Mago vekamo'a konaga'amo'mo age'nigeno hosu kava'mo ofalisiya agufa hosu kava'mo hu'nisigeno ageteno'ae'mo Gotife'mo afi gesigeno'ae'mo ani konaga'amo'mo falisiya agufa hosu kava'mo osu'niya konaga'amo'mo maige maige huno maisiya ya'mo alino amigiye. Mago vekamo'a alagi falisiya agufa hosu kava'mo nehisiyana nunumu hutapa ateyo, hu'na nosuve.

<sup>17</sup> Muki agufa alagepa osu kava'mo nehaya kava'mo'a hosu kava'mo hane'niya'monanafa mago hosu kava'mo'a alagi falisaya kavategamo alino no'apateya hosu kava'mo hane'niye.

<sup>18</sup> Goti'a alino apate'niya mafa'ne'amogimo hosu kava'mo akame nosae. Goti'a alino apate'niya vaya'mogi apakai'apile'mo yagai'a ne'apatageno'ae'mo hosu vekamo'a alino hosu huno no'apate.

<sup>19</sup> Lagaemo ago age'nonana Goti mafa'ne'amo mai'nona'monanafa muki ma mopafi'mo

mai'naya vaya'mogimo hosu vekamo aiyafi'mo mai'nageno yagaino ne'apate.

<sup>20</sup> Lagaemo ago age'nonana Goti Mafa'ne'amo emineno lama ge Goti'a ageta aeto hisunafe'mo lagesamo afisuna ya'mo alino lami'niye. Lagaemo lama ge vekafi'mo mai'netae'mo Mafa'ne'amo Yesu Kalaisipi'mo mai'none. Ani vekamo lama ge Goti'a mai'nenoe'ae'mo alagepa huta maige maige huta maisuna ya'mo aepa vekamo mai'niye.

<sup>21</sup> Aise mafa'ne'nimogitapae, aigofe goti'apimogimo apakame osutapa maita halove huta maiyo. He, lama ge.

**Saufa Kotalake Gemae**  
**The New Testament and Portions of the Old**  
**Testament in the Keyagana Language of Papua New**  
**Guinea**  
**Sampela hap Buk Baibel long tokples Keyagana long**  
**Niugini**

copyright © 2001 Wycliffe Bible Translators, Inc.

Language: Keyagana

Translation by: Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 18 Apr 2025 from source files dated 31 Aug 2023

dec78c50-71b7-5d19-97bf-bf625abcf44